

## 每週經課朗誦經文（巴克禮台語漢字）2011/12/25

### 共同經課-1 以賽亞書五十二章七節～十節

7 報好消息，傳和平，報福氣的好消息，傳救恩的，對錫安講：你的上帝做王啦！此人的腳上山頂到即媛！8 聽啊，你守望的人的聲，in 出大聲，相及唱歌；因為耶和華倒來錫安的時，in 欲當頭對面看見。9 耶路撒冷拋荒的所在啊，著出歡喜的聲，相及唱歌；因為耶和華安慰伊的百姓，救贖耶路撒冷。10 耶和華佇萬國的目矚前 lut 伊的聖手；地極的人攏看見咱的上帝的拯救。

### 共同經課-2 詩篇九十八篇

1 恁著向耶和華唱新的歌！因為伊曾行奇妙的事；伊的正手及伊聖的手骨已經為家已行拯救。2 耶和華互人知伊的拯救，佇列邦人的目矚前顯明伊的公義；3 伊記念伊對以色列家所發出的慈愛及信實。地的四角攏看見咱的上帝的拯救。4 全地攏著向耶和華出歡喜的聲；著出大聲，歡喜唱歌謳佬伊！5 著彈琴唱歌謳佬耶和華，著彈琴和詩歌的聲謳佬伊！6 用號頭及哨角的聲，佇君王耶和華的面前出歡喜的聲！7 願海及其中所充滿的攏著出大聲；世界及踎佇彼中間的亦著出聲。8 願大水拍手掌；願諸個山佇耶和華的面前出歡喜的聲；9 因為伊來欲審判全地。伊欲照公義審判世界，照伊的正直審判列邦。

### 共同經課-3 希伯來書一章一節～四節，五節～十二節

1 願咱的主耶穌基督的恩典及恁的神相及佇啲。阿們！2 上帝佇在早已經託許個先知用多多段、多多方法給列祖講，3 今佇許個日的路尾託伊的子給咱講；就是伊所設立做承接萬物的後嗣，亦曾對伊來創造諸個世界。4 伊是上帝的榮耀所發出的光，是上帝本質的真像，伊用伊權能的話啲扶載萬物。已經成清潔罪的事，就坐佇極高的天頂大威嚴者的大旁。5 成做比諸個天使卡大，合佇伊所承接的名，比 in 卡尊貴。6 因為上帝豈曾對甚麼天使講：你就是我的子，我今仔日生你？閣講：我欲做伊的父，伊欲做我的子？7 到伊閣導大子入世間的時，就講：上帝諸個天使攏著拜伊。8 論到天使，就講：互伊的天使做風，伊的差用做火焰；9 若是論到子就講：上帝啊，你的座位代代佇啲；你的國權柄是正直的權柄。10 你愛公義，怨恨不法；所以上帝，你的上帝，用歡喜的油抹你，贏過你諸個同伴；11 閣講：主啊，起頭的時你下地地基；諸個天亦是你的手所造的。12 in 欲滅無，獨獨你久長佇啲。in 攏欲親像衣服漸漸舊。

### 共同經課-4 約翰福音一章一節～十四節

1 佇起頭有道，道及上帝相及佇啲，道就是上帝。2 此個道佇起頭及上帝相及佇啲。3 萬物對道來創造；見若受創造的，無一項毋是對伊來創造。4 活命佇伊的內面，此個活命是人的光。5 光照佇黑暗，黑暗無接納伊。6 有一人，對上帝差來，名叫約翰。7 此個人來做干證，是欲為著光做干證，互眾人對伊來信。8 伊毋是彼個光，是欲為著光做干證若定。9 有真的光來入世間，啲照萬人。10 伊佇世間，世間對伊來創造，也世間毋識伊。11 伊到家己的所在，也家己的人毋接納伊。12 見若接納伊的，就是信伊的名的人，伊就賞賜 in 有權成做上帝的子兒。13 in 毋是對血氣，亦毋是對肉體的意思，亦毋是對人的意思生的，就是對上帝。14 道成肉體，倚起佇咱中間，有恩典及真理滿滿。閣阮曾看見伊的榮光，親像獨生的子對父所得的榮光。